

Sehr geehrter Herr Landrat Glaser,
Sehr geehrte Damen und Herren.

Hochenterresante Zeita, so kennt ma dia aktuell Lage beschreiba, wer het vor a bar Johr sich vorstella kenna dass es au en eisem Landkreis so klamm wat mit de Finanza. Also mir traget dea Strukturkommissio au mit, allerdings moss ma noch scho au sea, dass ma noch scho fascht am Ende eiserer Möglichkeita sand. S negschde wär dass ma an de große Bauvorhaba goht, ond do glaubet mir dass sich do doch dr Grossdoil no schwer dot, wennglei mir no lang koin Aufschwung seat ond en sofern ischs scho froglich ob dia Notwendigkoit fir dia Bauvorhaba wirklich so groß isch. Wenn ma des also so durchzia will, dann wat ma an ra drastischa Erhöhung der Kroisumlage iber kuz oder lang it verbeikomma, zumal mir jo erscht a Ausgabeproblem hand, s Einnahmeproblem kommt vermutlich jo erscht en de nägschte Johr. Es wird sich also rausstella was realistischer war, em Herr Landrat sein Optimismus de letschte Johr oder eiser Pessimismus. I hau jo leschtes Johr scho von ra Abwärtsspirale gschwätzt.

Mir denket eisre Möglichkeita em Krois sand sehr begrenzt ond mir glaubet it dass mir eis was vorhalda messed, Herr Landrat sie hands scho mehrfach gsait mir hand god gwirtschaftet ond dr Ball liegt eindeutig bei dr Bundespolitik.

Des sehet mir genauso ond I mecht a mol apaar
Erklärungsversuch macha wieso mir en dia Bescheidene Lage
komma sand.

Wer scho lenger en dam Gremium sitzt, ka sich vielleicht no
dra erinnerna dass eiser Fraktio eiser Wirtschafts ond
Geldsystem scho emmer sehr kritisch gsea hot. Under dr
Erkenntnis dass es sehr schwierig isch dauernd zom Wachsa
ond wenn des Wachstom au no expotenziell sei soll, noch
sand dia Grenza irgendwann erreicht.

Des isch aus eiserer Sicht s Grondproblem, dr
Wachstomszwang aus dem sich alle andere Probleme noch
rausentwicklet.

Bis jetzt hot ma des Problem emmer mit ma Kriag glöst, noch
isch alles he ond de ganz Arbet ka wieder vo vonna los gau,
noch kriagsch au wieder zwoistellige Wachstomsrata na.

Leider isch des koi bsondrs intelligenda Lösung.

Eigentlich haune au denkt des funktioniert desmol nemme,
aber so wia des aussieht isch des nemme ganz abwegig, wenn
ma uf oimol wieder Kriegstüchtig wära will, kaum isch der
letschte Zeitzeuge nemme do, noch legt ma wieder los.

Diplomatie isch en eiserer Regierong a Fremdwort, wia hot de
letschte oiner gsait Friedensangst got om.

Dodrzua en Satz vom Ernest Hemmingway von 1934 den e voll ond ganz doil.

“Was einen deprimiert, ist die vollkommene Ruhe, mit der hier alle vom nächsten Krieg reden, als handelte es sich um eine ausgemachte Sache, die man hinnehmen muss.”

Wenn a regierong Sacha durchsetza will die normalerweise niemols von dr Bevölkerong akzeptiert wära dätet, noch gibts zwei Sacha dia hervorragend funktionieret.

Erschtens braucht ma a Feindbild ond zwoitens moss ma de Leit Angst macha.

Ond do wondret ma sich noch scho wia ma vor Corona Angst ghet hot, vor ra Grippe, aber wenns en Krieg got,do soll ma noch mit Begeisterong drbei sei. Rational isch des it.

Aber ma ka natirlich au wonderbar vom oigena Versaga ablenka, wenn ma a gscheids Feindbild hot.

Erstaunlicherweise ischs noch au no so, om so tiefer ma da Karra en Dreck nei gfahra hot umso selbstbewusster tritt ma auf.

En dam zusammahang vielleicht no ebbes, I selber lass me gera mol Foppa ond I mach des selber au it ganz ogera.

Wa mir aber it braucha kennet isch, wenn ma eis aliagt ond wenn ma eis Verarscha will. Aber genau des isch seit geraumer Zeit scheinbar en dr Regierong zom Volkssport wora. I kenn no Zeita do wär sowas ogleich schwerer gwea,

weil ma no a einigermasa funktionierenda 4 Gewalt ghet hot.
Des isch heit leider alles andersch.

Beschtes Beispiel Corona, wer d Protokolle vom Robert Koch Institut kennt, ka schier nemme bestreita dass ma von dr Politik agloga wora isch von henda bis vonna.

Aber weil dia sogenannte Qualitätsmedien des Spiel no mitgspielt hand, kennet da Inhalt halt au bloss wieder dia, wo vorher scho kritisch waret, s gleiche mit de Untersuchungsausschüss wo aktuell laufet. Wenn berichtet wird, noch so, dass ebbes us em Zammahang grissa wat ond es noch no einigermassa ens oigene Narrativ neibasst.

Mir kennet eis no an Zeita erinnra wo a kritischer Bürger durchaus erwünscht war, heit bisch je noch Thema entweder Rechtsradikal, Verschwörungstheoretiker oder Delegitimierer des Staates, Putinverstehere, Klimaleugner ond was no so alles gibt.

So, eigentlich hed e jetzt no Ausführonga zom Klimawandel gmacht, dass dr Bill Gates ond s Potsdamer-Institut für Klimafolgen grad zruckrudret und mir gschpannt sand was des fir Folge hot, oder iber d Ukraine ond wia dia ganze Experta komplett falsch gleaga sand mit ihre Prognosa ond no was iber d Energiewende ond wia dia Wirtschaftsweise emmer drneaba lieget mit ihre Prognosa ond dass Gentechnik en dr Landwirtschaft wieder zuglau wird obwohl iber 90% der Bevölkerong des it wellet.

Aber no isch mer a Video über “Werden wir gut regiert Die 100” a Sendong wo grad erscht en dr ARD gloffa isch, en d Fenger komma.

Was peinlicheres haune bis dato noit verlebt, des isch Volksverblödong auf höchstem Nivea ond bestätigt eiser Medienkritik von vor zwoi Johr nomol eindrücklich.

Ond noch kriagt d Frau Merkel no en Orda fir ihre Verdinschte om ihra Corona Politik.

Do moss ma ehrlich sa des raubt eis scho des bissle Optimismus wo ma no ghet hot. Isch des tatsächlich des Niveau wo ma en Deutschland enzwischa hand.

Trotzdem wünsche alle scheane Weihnachda ond dass em nuia Johr weniger Ideologie ond wieder me Realität ond Rationalität en Vordergrund tritt.

Vielen Dank für ihre Aufmerksamkeit

.

